

**III RADNA SJEDNICA UPRAVNOG ODBORA
Javne ustanove Bosansko narodno pozorište Zenica**

Z A P I S N I K

MJESTO: Trg Bosne i Hercegovine broj 3, Zenica, zgrada Javne ustanove Bosansko narodno pozorište Zenica, II sprat, Kancelarija broj 45
DATUM: ponedjeljak 28. 11. 2022. godine
VRIJEME: 16.00 h

Sjednici prisustvuju:

1. dipl. pravnik **Una Selimović**, predsjednica
2. dipl. profesor **Aldina Aganović**, članica
3. dipl. glumac **Adis Mehanović**, član

ZAPISNIČARKA:

4. **Selma Tabaković-Jašar**, voditelj Pravne službe JU BNP Zenica.
Sjednici, po službenoj dužnosti, prisustvuje i direktor BNP Zenica, **Miroljub Mijatović**.

Dnevni red:

1. Usvajanje Zapisnika sa 2. radne sjednice;
2. Kraći izvještaj o realiziranim i planiranim programsko-poslovnim aktivnostima, gostovanjima i ostvarenoj saradnji JU BNP Zenica - *izvjestilac*: direktor JU BNP Zenica;
3. Razmatranje novog prijedloga Pravila JU BNP Zenica u skladu sa zaključkom sa 2. radne sjednice – *izvjestilac*: direktor JU BNP Zenica;
4. Prijedlog Pravilnika o dugoročnom zakupu prostornih kapaciteta u skladu sa zaključkom sa 2. radne sjednice – *izvjestilac*: direktor JU BNP Zenica;
5. Prijedlog izmjene akta o unutrašnjoj organizaciji i sistematizaciji radnih mjesta u dijelu koji se odnosi na naziv i opis radnih mjesta: *scenograf i radnik na poslovima sigurnosti i održavanja* prema Inicijativi direktora broj: 1088/22– *u prilogu*;
6. Prijedlog direktora (broj: 1087/22) o izmjeni člana 4. Pravilnika o načinu prodaje, cijeni ulaznica i popustima, uslovima najma prostornih kapaciteta, utvrđivanju kriterija za dodjelu pozivnica i gratis ulaznica na osnovu mišljenja voditelja Službe marketinga i prodaje (broj: 1002/22);
7. Informacija o objavi Javnog oglasa za prijem radnika u radni odnos - *izvjestilac*: direktor JU BNP Zenica;
8. Informacija o objavi Konkursa za najbolji bosanskohercegovački dramski tekst - *izvjestilac*: direktor JU BNP Zenica;
9. Razno.

ZAKLJUČAK: Upravni odbor JU BNP Zenica jednoglasno usvaja Zapisnik sa druge radne sjednice, koji je prethodno dostavljen elektronskim putem.

2. **Kraći izvještaj o realiziranim i planiranim programsko-poslovnim aktivnostima, gostovanjima i ostvarenoj saradnji JU BNP Zenica - *izvjestilac*:** direktor JU BNP Zenica

ZAKLJUČAK: Prema riječima direktora JU BNP Zenica:

U subotu, 26. novembra 2022. godine premijerno je izvedena nova predstava “Trainspotting” u režiji Lajle Kaikčija. U narednom periodu, počevši od mjeseca decembra planiran je početak rada na novoj predstavi prema tekstu “Grobnica za Borisa Davidovića” u režiji Zlatka Pakovića. Premijerna izvedba planirana je 03. februara 2023. godine.

U mjesecu septembru potpisan je protokol o saradnji sa jedanaest ustanova kulture (centri i domovi za kulturu) sa područja Zeničko-dobojskog kantona, s obzirom na intenciju jačanja umjetničke saradnje i nastojanje da predstave u produkciji JU BNP Zenica što više gostuju i na drugim scenama ZDK, a za

sada su planirana gostovanja dvije predstave (jedna za odrasle i jedna za djecu) u jednoj pozorišnoj sezoni.

Jedan dio gostovanja predstava je i realiziran, a preostali dio će biti prema naknadnom dogovoru sa ustanovama kulture u narednom periodu.

Takođe, u mjesecu decembru 2022. godine slijedi organizacija još jednog Internacionalnog festivala edukativnog teatra-IFET, sedmog po redu sa bogatim sadržajem za najmlađe.

U cilju organiziranih izvedbi predstave "Trainspotting" za srednjoškolce i studente do druge godine fakulteta održan je radni sastanak sa prosvjetnim radnicima, nadležnim radnicima JU BNP Zenica i predstavnicima Instituta za zdravlje i sigurnost hrane, radi dogovora o mogućnostima i načinu realizacije ovih planiranih aktivnosti. Izvedbe predstave bi bile u matineja terminu i uključivale bi poseban edukativni razgovor sa publikom nakon izvedbe.

Član Upravnog odbora Adis M. predlaže da se posebna pažnja posveti razgovoru o drugim aspektima predstave, s obzirom na njenu tematiku.

Ujedno, imenovani član UO predlaže organizaciju posjete školama u cilju saznanja o afinitetima učenika, odnosno šta ih zapravo zanima.

Direktor JU BNP Zenica je saglasan da se obrati posebna pažnja na razgovor mladih ljudi nakon predstave, posebno jer u školama nedostaje razgovor sa psiholozima i socijalnim radnicima, a što je dijelom bila i tema radnog sastanka u vezi sa organiziranim izvedbama predstave "Trainspotting".

U tom smislu, direktor JU BNP Zenica naglašava postojanje plana postprodukcije predstave.

Što se tiče gostovanja van Zeničko-dobojskog kantona u mjesecu januaru 2023. godine planirana su izvedbe predstava "Trainspotting" i "Siročad" u Sarajevu.

U prethodnom periodu uspješno su realizirana gostovanja na festivalu "Zaplet" u Banja Luci i festivalu "Susreti pozorišta" u Brčkom, gdje su članovi glumačkog ansambla ostvarili i nagrade, Enes Salković – Nagradu za najboljeg glumca i Zlatan Školjić – Nagradu za najboljeg mladog glumca u predstavi "Siročad". Glumac Saša Handžić ostvario Nagradu za najbolju sporednu ulogu u dvije predstave, jednu u produkciji JU BNP Zenica, a drugu u koprodukciji SARTR-a Sarajevo i Peripetija Production iz Skoplja.

Saradnik Mirza Rahmanović osvojio je Nagradu za najbolju muziku u predstavi „Kuća“ u produkciji JU BNP Zenica.

3. Razmatranje novog prijedloga Pravila JU BNP Zenica u skladu sa zaključkom sa 2. radne sjednice – izvjestilac: direktor JU BNP Zenica;

ZAKLJUČAK: Članovi Upravnog odbora predlažu izmjenu člana 55. prijedloga Pravila JU BNP Zenica, na sljedeći način:

- (1) Prijedlog člana Upravnog odbora iz reda pozorišnih umjetnika pri glasanju mora ostvariti najmanje 51% glasova u odnosu na ukupan broj prisutnih radnika Pozorišta.
- (2) Kvorum za glasanje čini najmanje dvije trećine ukupnog broja radnika Pozorišta.
- (3) Obaveza prisustva zboru pozorišnih radnika i svih radnika Pozorišta Zenica uređuje se Pravilnikom o radu.

Takođe, Upravni odbor jednoglasno usvaja propisivanje uslova za prijem na funkciju direktora JU BNP Zenica od najmanje tri godine radnog iskustva, što se uređuje u stavu (1) tačka d) člana 64. novog prijedloga Pravila JU BNP Zenica.

U preostalom dijelu prijedlog Pravila jednoglasno se usvaja u cjelosti.

Nakon izvršenih korekcija isti će biti dostavljen na Oglasnu ploču na uvid radnicima JU BNP Zenica, radi dostave eventualnih prijedloga i sugestija, a nakon toga upućen na usvajanje Upravnom odboru u finalnoj verziji koja će biti dostavljena na saglasnost osnivaču.

4. Prijedlog Pravilnika o dugoročnom zakupu prostornih kapaciteta u skladu sa zaključkom sa 2. radne sjednice – izvjestilac: direktor JU BNP Zenica;

ZAKLJUČAK 1: Upravni odbor JU BNP Zenica usvaja dostavljeni prijedlog Pravilnika o dugoročnom zakupu prostornih kapaciteta uz sljedeće napomene:

- ukupna površina Kabare kluba koji se daje u zakup bit će naknadno korigovana nakon provjere iste, s obzirom na trenutnu promjenu, odnosno vraćanje u prijašnje stanje dijela prostorija istog, čime se vrši promjena jednog dijela površine.

Informaciju o navedenom će naknadno dostaviti direktor JU BNP Zenica i ista će biti unesena u odredbe ovog Pravilnika.

- visina mjesečne zakupnine bit će utvrđena naknadno prema informaciji o površini prostora, a u skladu sa posebnom namjenom, programom rada, ograničenjima u obavljanju ugostiteljske djelatnosti, ali i eventualnim naknadnim infrastrukturnim ulaganjima predloženim od strane ponuđača na osnovu objavljenog javnog poziva i postavljenih uslova, bez narušavanja arhitektonskog integriteta objekta.

ZAKLJUČAK 2. - Upravni odbor JU BNP Zenica još jedanput naglašava važnost definisanja uslova najma kroz ugovorne odredbe, redovno plaćanje zakupnine, druge obaveze zakupca i prilagođavanje rada prema rasporedu proba, odnosno poštivanje kućnog reda pozorišta, a posebno što se tiče eventualne buke i održavanja muzičkog programa unutar zakupljenog prostora.

5. Prijedlog izmjene akta o unutrašnjoj organizaciji i sistematizaciji radnih mjesta u dijelu koji se odnosi na naziv i opis radnih mjesta: *scenograf i radnik na poslovima sigurnosti i održavanja* prema Inicijativi direktora broj: 1088/22 – u prilogu

ZAKLJUČAK: Upravni odbor JU BNP Zenica jednoglasno usvaja dostavljeni prijedlog izmjene akta o unutrašnjoj organizaciji i sistematizaciji radnih mjesta u dijelu koji se odnosi na naziv i opis radnih mjesta: *scenograf i radnik na poslovima sigurnosti i održavanja*, na osnovu inicijative direktora JU BNP Zenica broj gornji.

Uz posebno donesenu Odluku Upravnog odbora JU BNP Zenica, na Oglasnu ploču bit će dostavljen prilog sa usvojenom izmjenom i dopunom iz Inicijative broj 1088/22 i ista stupa na snagu osmog dana od dana objave. Navedeno se ima dostaviti na uvid i predstavniku sindikalne organizacije JU BNP Zenica.

6. Prijedlog direktora (broj: 1087/22) o izmjeni člana 4. Pravilnika o načinu prodaje, cijeni ulaznica i popustima, uslovima najma prostornih kapaciteta, utvrđivanju kriterija za dodjelu pozivnica i gratis ulaznica na osnovu mišljenja voditelja Službe marketinga i prodaje (broj: 1002/22);

ZAKLJUČAK: Upravni odbor JU BNP Zenica sa jednim glasom „protiv“ predsjednice i dva glasa „za“ članova, usvaja prijedlog izmjene člana 4. Pravilnika o načinu prodaje, cijeni ulaznica i popustima, uslovima najma prostornih kapaciteta, utvrđivanju kriterija za dodjelu pozivnica i gratis ulaznica, na osnovu inicijative direktora i mišljenja voditelja Službe marketinga i prodaje broj gornji. Pomenuta odredba mijenja se u dijelu koji se odnosi na visinu ulaznica za predstave Dječije, omladinske i lutkarske scene na način da se cijena ulaznica za premijerne izvedbe umjesto =5,00 KM mijenja u =7,00 KM, a cijena za reprizne izvedbe umjesto dosadašnjih =3,00 KM u =5,00 KM.

Cijena za organizovane posjete škola i drugih institucija iznosi =3,00 KM.

O prethodnom se donosi posebna Odluka Upravnog odbora JU BNP Zenica.

7. Informacija o objavi Javnog oglasa za prijem radnika u radni odnos - izvjestilac: direktor JU BNP Zenica;

ZAKLJUČAK: U utorak, 01. 11. 2022. godine u dnevnim novinama „Oslobođenje“, internetskoj stranici Grada Zenica (www.zenica.ba), kao i na Oglasnoj ploči Službe za zapošljavanje ZDK - Biro rada Zenica objavljen je Javni oglas za prijem radnika u radni odnos na 5 radnih mjesta: dramski umjetnik-glumac (početnik), scenograf, nabavljač-vozač, pomoćni scenski dekorater i rekviziter. Konkursna procedura je u toku i po okončanju iste Upravni odbor JU BNP Zenica će biti obaviješten o navedenom.

Upravni odbor prima na znanje dostavljenu informaciju.

8. Informacija o objavi Konkursa za najbolji bosanskohercegovački dramski tekst - izvjestilac:
direktor JU BNP Zenica;

ZAKLJUČAK: Konkurs za najbolji bh. dramski tekst prvi put je objavljen 2019. godine u okviru aktivnosti Festivala bh. drame. S obzirom na pozitivne efekte prvog Konkursa, donesena je odluka da se istovjetan Konkurs objavi i ove godine. Autor najboljeg dramskog teksta bit će proglašen laureatom „Nagrade za najbolji neinscenirani dramski tekst bosanskohercegovačkog autora/autorice“ koja se sastoji od plakete i novčanog dijela nagrade u ukupnom neto iznosu od =3.000,00 KM (slovima: tri hiljade/tisuće konvertibilnih maraka). Najboljem autoru nudi se mogućnost postavljanja dramskog teksta na scenu JU BNP Zenica, kada se za to ostvare potrebni uslovi.

9. Razno

9.1. PROJEKAT SANACIJE RAVNOG KROVA-

- prema informaciji direktora JU BNP Zenica ukupna procjena vrijednosti radova na sanaciji ravnog krova prema novom sačinjenom Predmjeru i predračunu radova iznosi =1.330.592,48 KM sa PDV-om. Procjena je rađena za slučaj korištenja skupljeg materijala, te isto može biti predmet dalje korekcije, ako bi to bilo nužno,
- prema informaciji predstavnika osnivača na posebno održanom sastanku, Budžetom Grada Zenica za narednu godinu predviđa se iznos od =800.000,00-850.000,00 KM namjenskih sredstava za realizaciju ovog projekta sanacije i
- skladu sa prethodnim, nastojanja su da se potrebna razlika neophodnih sredstava namiri iz sredstava drugih nivoa vlasti, posebnih fondova i drugo, sve u dogovoru sa osnivačem.

ZAKLJUČAK 1: Upravni odbor JU BNP Zenica prima na znanje dostavljene informacije i u narednom periodu će biti obaviješten, sa namjerom da se aktivno uključi u osiguranje uslova za početak realizacije ovog značajnog projekta.

9.2. - AKT JP „GRIJANJE“ d.o.o. ZENICA -

Prema informaciji direktora JU BNP Zenica dana 21. 11. 2022. godne dostavljen je akt J.P. „GRIJANJE“ d.o.o. ZENICA sa Zapisnikom o utvrđivanju površine poslovnog prostora priključenog u grijanje. Troškove grijanja trenutno snosi osnivač, Grad Zenica.

Uvidom u prethodni Zapisnik utvrđeno je da, prema evidenciji JP „Grijanje“, površina u okviru zgrade JU Bosansko narodno pozorište Zenica koja je priključena na mrežu daljinskog grijanja iznosi =5602,62 m², iako ista nije evidentirana od strane radnika ovog javnog preduzeća, jer nije zailježena službena posjeta radi zapisničkog utvrđivanja. Prema dostupnim internim podacima, dio prostora u međuvremenu isključen je iz mreže daljinskog grijanja (prostor Donjeg foajea, magacinski prostori i drugi), te se ne zagrijava već dugi niz godina iz razloga stalnih kvarova i loše finansijske situacije Javne ustanove, pa bi površina priključena na mrežu daljinskog grijanja prema dostupnoj procjeni trebala iznositi znatno manje, odnosno okvirno ≈1000,00 m². U tom smislu, uočena je potreba upućivanja dopisa za tačno utvrđivanje površine prostora koji su priključeni na mrežu daljinskog grijanja.

ZAKLJUČAK 2: Upravni odbor JU BNP Zenica prima na znanje dostavljenu informaciju i daje saglasnost na upućivanje dopisa sa prethodno navedenim prijedlogom.

9.3. - SANACIJA STAKLENIH PLOHA –

Na osnovu iskazane inicijative, direktor dostavlja informaciju da će Grad Zenica omogućiti sredstva za sanaciju, odnosno zamjenu četiri oštećene staklene plohe na foajeu JU Bosansko narodno pozorište Zenica.


ZAKLJUČAK 3: Upravni odbor JU BNP Zenica prima na znanje dostavljenu informaciju.

9.4. - PARKING KOD SLUŽBENOG ULAZA U ZGRADU JU BNP ZENICA –

ZAKLJUČAK 4: Kako je član Upravnog odbora, Adis M. prethodno pokrenuo pitanje rješavanja neovlaštenog parkiranja na dijelu službenog parkinga uz zgradu JU BNP Zenica, namijenjenog za radnike, a što ujedno u određenim slučajevima otežava pristup zgradi, teretnom prilazu, direktor JU BNP Zenica će još jedanput provjeriti da li se tu nalazi i požarni put, te će se isto pokušati riješiti u narednom periodu.

Sjednica je zaključena u 17.50 h.

ZAPISNIČARKA



Selma Tabaković-Jašar

**PREDSJEDNICA UPRAVNOG ODBORA
JU BNP ZENICA**



Una Selimović

Zapisnik je sačinjen na pet (5) numeriranih stranica.

Zenica, 6 . 12. 2022. godine
Broj: 1291/22